


प्रसार भारती
प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन

18.45 भुक्रवार

दिनांक 20.03.2026



प्रमुख समाचार –

- 1-राज्य विधानसभा बजट सत्र के आज समापन होइस-आखिरी दिन लोक भर्ती अउ व्यावसायिक परीक्षा म अनुचित साधन के रोकथाम विधेयक सर्वसम्मति ले पारित करे गिस।
- 2-जल जीवन मिसन के तहत केंद्र अउ राज्य सरकार के बीच समझौता ज्ञापन म करे गिस हस्ताक्षर।
- 3-भगवान झूलेलाल के जयंती अउ चेट्टीचंड के परब के मउका म प्रदेशभर म होवत हे आने-आने कारीकरम के आयोजन।

विधानसभा समाचार-01

छत्तीसगढ़ विधानसभा बजट सत्र के आज समापन होइस। तेईस फरवरी ले सुरु होय ए सत्र म कुल पंद्रह ठन बइठका होइस। समापन के मउका म सभापति धरमलाल कौशिक ह विधानसभा अध्यक्ष डॉक्टर रमन सिंह के संदेस के वाचन करिन। ओमन बतइन कि ए सत्र म कुल दू सौ चवालिस स्थगन के सूचना मिले रिहीस। सून्यकाल के एक सौ सैंतीस सूचना मिले रिहीस, जेमा ले चालीस सूचना ग्राह्य करे गिस। उहें, सात ठन अशासकीय संकल्प ग्राह्य होइस, जेमा एक ठन संकल्प स्वीकृत होइस। उहें, आठ विधेयक उपर चर्चा होइस अउ सबो ल पारित कर देय गिस।

एखर पहिली, आज सदन म छत्तीसगढ़ लोक भर्ती अउ व्यावसायिक परीक्षा म अनुचित साधन के रोकथाम विधेयक सर्वसम्मति ले पारित करे गिस। ए विधेयक म नकल माफिया, फजी अभ्यर्थी अउ तकनीकी जरिया ले धोखाधड़ी करइया मनके खिलाफ दंडात्मक कार्रवाई के प्रावधान करे गेहे। संगेसंग दोषी पाय जाय म 3 ले 10 बछर तक के सजा अउ जादा ले जादा एक करोड़ रुपिया तक के जुर्माना के प्रावधान हे। उहें, नकल म लिप्त अभ्यर्थी मन ल तीन बछर तक कोनो घलो भर्ती परीक्षा म बइठन नइ दे जाही।

मुख्यमंत्री विष्णुदेव साय ह विधेयक उपर चर्चा के बेरा किहीन कि-एहा नकल गिरोह मन उपर सख्त कार्रवाही बर बनाय गेहे। संगठित अपराध के स्थिति म आरोपी मनके संपत्ति जब्त करे अउ कुर्की के घलो प्रावधान करे गेहे। संगे इलेक्ट्रानिक जिनिंस ले नकल करइया मन उपर घलो सख्ती बरते जाही। मुख्यमंत्री ह किहीन कि ए कानून के दायरा बड़का होही अउ एहा पीएससी, व्यापम, निगम-मंडल संगे सबो भर्ती परीक्षा उपर लागू होही।

विधानसभा समाचार-02

उहें, सदन म आज वाणिज्यिक कर मंत्री ओपी चौधरी के डहार ले पेस करे गे छत्तीसगढ़ उप कर संशोधन विधेयक ल घलो पारित करे गिस। ए विधेयक के उद्देश्य संपत्ति पंजीयन म लगइया बारह प्रतिशत उपराहा उप कर सुल्क ल खतम करना हे। ए संसोधन ले संपत्ति खरीदइया मन ल बड़का राहत मिलही अउ स्टाम्प सुल्क म कमी आही।

एखर ले पहिली, विधानसभा म काली गृह निर्माण मंडल अधिनियम संसोधन विधेयक ल घलो पारित करे गिस। अब छत्तीसगढ़ गृह निर्माण मंडल के नांव बदलके **छत्तीसगढ़ गृह अउ अधोसंरचना विकास मंडल** करे गेहे। एखर अलावा सदन म **छत्तीसगढ़ नगर** के संग **ग्राम निवेश संसोधन विधेयक** ल घलो ध्वनिमत ले पारित कर दे गिस।

छत्तीसगढ़ धर्म स्वातंत्र्य विधेयक

छत्तीसगढ़ विधानसभा म काली छत्तीसगढ़ धर्म स्वातंत्र्य विधेयक ल चर्चा के बाद पारित करे गिस। उपमुख्यमंत्री विजय शर्मा ह किहीन कि ए विधेयक म धरम परिवर्तन के प्रक्रिया ल पारदर्शी बनाय बर स्पष्ट प्रावधान करे गेहे। अब धर्म परिवर्तन करइया ल प्राधिकृत अधिकारी के आगू अर्जी लगाय बर पड़ही, एखर बाद निर्धारित बेरा म सूचना सार्वजनिक करे के संग आपत्ति आमंत्रित करे जाही। जांच के बाद ही प्रमाण पत्र जारी करे जाही।

अवैध धर्मांतरण ल रोके बर विधेयक म कड़ा प्रावधान करे गे हे। सामान्य अवैध धर्मांतरण उपर सात ले दस बछर तक कारावास अउ पांच लाख रुपिया तक जुर्माना के प्रावधान हे। उहें, माईलोगन, अनुसूचित जाति, जनजाति अउ नाबालिग के अवैध धर्मांतरण उपर दस ले बीस साल के सजा अउ दस लाख रुपिया तक के जुर्माना होही अउ उहें, सामूहिक अवैध धर्मांतरण उपर आजीवन कारावास अउ कम से कम पच्चीस लाख रुपिया जुर्माना के प्रावधान हे।

एखर उपर मुख्यमंत्री ह किहीन कि नवा विधेयक के लागू होय ले समाज के कमजोर वर्ग ल लालच, दबाव अउ भ्रम फैलाके धर्मांतरण कराय के घटना उपर रोक लगही।

जल जीवन मिशन—एमओयू

मुख्यमंत्री विष्णुदेव साय आज विधानसभा परिसर ले—जल जीवन मिशन टू पॉइंट जीरो के तहत केंद्र अउ राज्य के बीच एमओयू कारीकरम म वीडियो कॉन्फ्रेंसिंग के जरिया ले सामिल होइन। जिंहा मुख्यमंत्री अउ केंद्रीय जल सक्ति मंत्री के वर्चुअल मौजूदगी म अधिकारी मन समझौता उपर हस्ताक्षर करिन।

ए मउका म मुख्यमंत्री ह किहीन कि— हर घर जल के लक्ष्य ल चेत म राखत जल जीवन मिशन के तहत ए समझौता ले विकास कारज ल गति मिलही।

खेलो इंडिया नेशनल ट्राइबल गेम्स

प्रदेस म पच्चीस मार्च ले सुरु होवइया **‘खेलो इंडिया नेशनल ट्राइबल’** गेम्स म देसभर के जनजातीय खिलाड़ी सात टन खेल म अपन प्रतिभा दिखाहीं। उपमुख्यमंत्री अरुण साव ह बतइन कि सुभारंभ के मउका म केंद्रीय खेल मंत्री मनसुख मांडविया अउ मुख्यमंत्री विष्णुदेव साय बिसेस रूप ले मौजूद रइहीं। ए खेल म देस के **बत्तीस** राज्य अउ केंद्रशासित प्रदेस के करीबन **तीन हजार** खिलाड़ी हिस्सा लिहीं।

“बस्तर हेरिटेज मैराथन”

प्रदेस म खेल मन ल बढ़ावा अउ बस्तर के सांस्कृतिक बिरासत ल राष्ट्रीय मंच म लाने के उद्देश्य ले बाईस मार्च के जगदलपुर म “बस्तर हेरिटेज मैराथन” के आयोजन करे जाही। ए मैराथन लालबाग मैदान ले सुरू होके चित्रकोट जलप्रपात तक जाही। मैराथन म बयालीस, इक्कीस, दस अउ पांच किलोमीटर जइसन आने-आने श्रेणी राखे गेहे, जेमा देसभर के धावक सामिल होहीं। विजेता प्रतिभागी मन बर पचीस लाख रुपिया तक के इनाम राखे गेहे।

मुख्यमंत्री विष्णुदेव साय ह किहीन कि ए आयोजन ‘रन फॉर नेचर-रन फॉर कल्चर’ थीम के संग राज्य के चिन्हारी ल नवा ऊंचाई तक ले जाही अउ युवा मन ल खेल के प्रति प्रेरित करही।

चेट्टीचण्ड-पर्व

भगवान झूलेलाल के जयंती अउ चेट्टीचंड के परब आज गजब उछाह के संग मनाय जावत हे। ए मउका म प्रदेसभर म आने-आने कारीकरम आयोजित करे जावत हे। उहें, कतकोन जघा शोभायात्रा घलो निकालत हैं। ए मउका म मुख्यमंत्री विष्णुदेव साय ह प्रदेसवासी अउ बिसेस रूप ले सिंधी समाज ल ए परब के बधई अउ सुभकामना देइन हैं। ए मउका म मुख्यमंत्री ह किहीन कि-चेट्टीचंड सिंधी समाज के परमुख परब आय, जेन न सिरिफ झूलेलाल के जयंती के रूप म भलुक नवा बछर के रूप म घलो बड़ उछाह के संग मनाय जात हे।

बातों-बातों में

सुनइया मन ल बतादन कि प्रादेशिक समाचार एकांश के समसामयिक बिसय उपर आधारित कारीकरम “बातों-बातों में” ए दरी छत्तीसगढ़ ल नक्सलवाद समस्या ले मुक्त बनाय बर करे गे उदिम उपर केंद्रित रइही। ए कारीकरम के प्रसारण काली इक्कीस मार्च के आकाशवाणी केंद्र रइपुर डाहर ले एफ.एम. अउ प्रायमरी चैनल म बिहनिया नौ बजे ले करे जाही। जेला छत्तीसगढ़ के जम्मो आकाशवाणी केंद्र एक्के संघरा रिले करहीं।

अफीम खेती

दुरुग अउ बलरामपुर के बाद अब रायगढ़ जिला म घलो अफीम के खेती के मामला आगू आय हे। मिले जानकारी ले तमनार थाना इलाका के आमाघाट गांव म करीबन एक एकड़ म आने फसल के बीच म लुकाके अफीम के खेती करे जावत रिहीस। एखर सूचना मिलतेच पुलिस अउ प्रशासन के टीम ह मउका म पहुंचिस अउ एक झन आरोपी ल गिरफ्तार कर लिस। जांच म पता चलिस की झारखंड के रहवइया मार्सल सांगा ह आमाघाट म रहिके अफीम के खेती करत रिहीस हे, जेला गिरफ्तार कर ले गेहे।

मुख्यमंत्री-अधिकारी मुलाकात

नेशनल डिफेंस कॉलेज के प्रशिक्षु सैन्य अउ सिविल सेवा के पंद्रह सदस्यीय अध्ययन दल ह आज रइपुर म मुख्यमंत्री विष्णुदेव साय ले भेंट करिस। ए बेरा मुख्यमंत्री ह पांच दिन के छत्तीसगढ़ दउरा म आय ए अधिकारी मनके सुवागत करिन। ए बेरा किहीन कि छत्तीसगढ़ के धरती म सघन वन, प्राकृतिक संसाधन, खनिज संपदा, लोक संस्कृति के अमूल्य विरासत अउ नैसर्गिक सौंदर्य के अद्भुत संगम हे। प्रदेस के विकास के सबले बड़े बाधा नक्सलवाद ल केंद्र अउ राज्य सरकार ह मिलके दुरिहा देय हे। ए बेरा अध्ययन दल के अगुवई करइया ‘एयर कमांडोर’ अजय कुमार चौधरी ह छत्तीसगढ़ प्रवास के अनुभव साझा करत इहा के भौगोलिक, सांस्कृतिक अउ प्रशासनिक बिसेसता ल गजब संहराइन।